

## **Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 22, 23. december 2013-imeersoq**

Efterskolit pillugit Inatsisartut inatsisaanni nr. 13-imi, 5. december 2008-meersumi § 20, imm. 2 Inatsisartut inatsisaatigut nr. 17, 3. december 2012-imeersukkut allangortinneqartoq naapertorlugu makku aalajangersarneqarput:

### **Kapitali 1**

#### *Tapiissuteqariaatsit tapersiissutillu*

**§ 1.** Aningaasanut inatsimmi aningaasaliissutigineqartut iluanni Ilinniartitaanermut Naalakkersuisoqarfik Danmarkimi efterskolimiinnermut atatillugu makkununga tapiissuteqarsinnaavoq:

- 1) Angajoqqaat akiliutaannik appartitsinissamut.
- 2) Ilinniarnep aallartilerneranut ilinniarunnaarnermullu atasumik Kalaallit Nunaannit utimullu ilinniartup angalaneranut,
- 3) Ilinniartup angalanerminut atasumik pisariaqartumik unnuisariaqarneranut,
- 4) Ilinniartup angalanerani pisariaqartitsineq naapertorlugu nerisaqarneranut.
- 5) Qanigisat napparsimarulunnerannut toqunerannulluunniit atasumik Kalaallit Nunaannut utimullu ilinniartup angalaneranut.
- 6) Timikkut tarnikkulluunniit innarlutillip taassumalu attaveqaataata imaluunniit ilaquataata ataatsip misissuiartorlutik angalanerannut.
- 7) Ilinniartunut immikkut pisariaqartitsisunut ikiorsiissutinut, tak. § 3.

*Imm. 2.* Qanigisatut, tak. imm. 1, nr. 5, paasineqassapput qatanngutit, apparisaq, qitornat, angajoqqaat aamma aanaa/aataakkut. Immikkut ittumik pisoqartillugu Ilinniartitaanermut Naalakkersuisoqarfiup inuit allat qanigisatut isigineqarnissaat akuersissutigisinnaavaa.

**§ 2.** Misissuiartorluni angalanermut, tak. § 1, imm. 1, nr. 6, tapiisoqartarpoq, ilinniartup immikkut ittumik ajornartorsiutaanut efterskolip sorliup naapertuunnerpaanerani paasiniaanissamut.

*Imm. 2.* Misissuiartorluni angalanermut ilaassaaq ilaqutariinnut attaveqaataasinnaasunut pulaarneq, ilinniartup efterskolernerani suleqatigiinnissamut tunngatillugu ataatsimoorussamik ilimagisaasut qulaajarnissaat siunertaralugu.

**§ 3.** Ilinniartunut immikkut pisariaqartitsisunut, tak. § 1, imm. 1, nr. 7, ikiorsiissutinut ilaapput ingerlassat ilinniartup immikkut pisariaqartitaanik aallaaveqarlutik ilinniartup iluatsitsisumik efterskolimiinnissaanut tapertaasinnaasut. Ikiorsiissutit suussusissaat

annertussusissaallu Ilinniartitaanermut Naalakkersuisoqarfimmut qinnuteqartoqareerneratigut aningaasaliiffigineqartassapput.

§ 4. Aningaasanut inatsimmi aningaasaliissutaasut iluanni Ilinniartitaanermut Naalakkersuisoqarfik ilinniartut naalakkersuisoqarfiup aaqqissugaanik angalasut Københavnimut apuunnerminni isumagineqarnissaannut, kiisalu efterskolernerup aallartinneranut atasumik ilisarititsilluni piareersaallunilu pikkorissaanernik ingerlatsinerut aningaasartuutitik matussusiisinnaavoq.

§ 5. Aningaasanut inatsimmi aningaasaliissutaasut iluanni Ilinniartitaanermut Naalakkersuisoqarfik makkununga akiliussigallarsinnaavoq:

1) Ilinniartut efterskolit ammanerisa avataanni ilaqutariinnit attaveqaataasunit allanilluunniit angajoqqaanit taamaaliornissamut pisinnaatinneqarsimasunit isumagineqarsinnaangitsut inissinneqarallarnerinut.

2) Taamaatinnermi akiliummut, tak. § 18, imm. 1, taamaattorli annerpaamik 8.000 kr-nik.

*Imm. 2.* Imm. 1 malillugu naalakkersuisoqarfiup aningaasartuutai tamatuma kingorna ilinniartumut angajoqqaatut oqartussaassusilinnut akiligassangortinneqassapput.

§ 6. Ilinniartitaanermut naalakkersuisoqarfiup aningaasaliissutaasut iluanni Danmarkimi efterskolini ilinniartut tamarmik ilinniarnissamik ilitsersorneqarnissaannut aningaasartuutit akilissavai.

## Kapitali 2

### *Tapiissutit annertussusaat*

#### *Efterskolimiinnerup akilernissaanut tapiissutit*

§ 7. Efterskolimiinnerup akilernissaanut tapi tassaavoq kr. 281 sapaatip-akunneranut, taamaattoq tak. imm. 2 aamma § 8.

*Imm. 2.* Ilinniartunut efterskolernermik nalaani Danmarkimi efterskolertunik qatannutilinnut ilinniartup pineqartup saniatigut qatannugtaanut efterskolertunut tamanut efterskolernermut tapi tassaavoq kr. 422 sapaatip-akunneranut.

§ 8. Angajoqqaatut oqartussaasut efterskolernissap aallartinnera ukiunik marlunnik sioqqullugu ukiumut kr. 280.000 qaangernagit akileraaruteqaataasussanik ataatsimut isertitaqarsimappata, § 7 malillugu tapit saniatigut, angajoqqaat akiliutissaannut apparsaatissamik immikkut tapiisoqassaaq, aningaasanut inatsimmi aningaasaliissutit aalajangiussat iluanni.

*Imm. 2.* Ilinniartut imm. 1 naapertorlugu qinnuteqareernikkut tapiiffigineqarsinnaatitaassapput, angajoqqaatut oqartussaasut qinnuteqarnerup nalaani ataatsimoorlutik isertitaat ima apparsimatigippata imm. 1 naapertorlugu tapiiffigineqarsinnaalerlutik. Qinnuteqaammut maannakkorpiaq isertitat pillugit uppernarsaatit ilanngunneqassapput, inaarutaasumik nalunaarusiaq kingulleq atorlugu, taamatullu qinnuteqarneq sioqqullugu qaammatini kingullerni pingasuni isertitarisimasat uppernarsaataat imaluunniit qinnuteqarneq sioqqullugu qaammatini kingullerni 3-ni isertitanut uppernarsaatit naammattut allat atorlugit.

*Imm. 3.* Tapiissutit annertussusissaat naatsorsorneqassaaq qinnuteqartut imm. 1-imi piumasqaatinik piviusunngortitsisut amerlassusaat tunngavigalugu, imaluunniit imm. 2 naapertorlugu tapiissuteqartoqarluni, aningaasaliissutit annertussusiannut sanilliussamik. Annerpaamik tapiisoqarsinnaavoq angajoqqaatut oqartussaasut namminneq akiliutissaat sapaatip-akunneranut 300 kr-nik minnerusussaajunnaarlugu.

*Imm. 4.* Ilinniartut imm. 1-imut aamma imm. 2-mut ilaasut aningaasaliissutit tamarmiusumik atornissaannut naammangippata, aningaasaliissutit sinneri agguanneqassapput ilinniartunut angajoqqaatut oqartussaasui efterskolernissap aallartinnera ukiunik marlunnik sioqqullugu kr. 280.000-it aamma 340.000-it akornanni akileraaruteqaataasussanik ataatsimut isertitaqarsimasunut.

*Imm. 5.* Angajoqqaatut oqartussaasut avissimappata averusersimappataluunniit, angajoqqaatut oqartussaasup meeqqap najugaqarfigisaata akileraaruteqaataasussamik isertitai imm. 1, 2 aamma 4 naapertorlugit tapiissutit annertussusissaannik naatsorsuinnermut tunngavigineqassapput.

*Imm. 6.* Angajoqqaatut oqartussaasoq ilinniartup najugaqarfia inooqateqarpat, inooqataasup akileraaruteqaataasussamik isertitai imm. 1, 2 aamma 4 naapertorlugit tapiissutit annertussusissaannik naatsorsuinnermi ilaatinneqassapput, qinnuteqaateqarneq ukiumik ataatsimik sioqqullugu aappariit katissimappata imaluunniit katissimanermut assingusumik inooqatigiissimappata.

*Angalanerit akilernissaannut, ineqarnermut nerisaqarnermullu tapiissutit*

**§ 9.** Ilinniartup angalaneranut aningaasartuutitut, tak. § 1, imm. 1, nr. 2 aamma 5, tapit tassaapput angallassissutitut tamanut atuuttunut akikinnerpaanut aningaasartuutit tamarmiusut.

**§ 10.** Misissuiartorluni angalanernut, tak. § 1, imm. 1, nr. 6, tapit tassaapput Danmarkimut utimullu pulaarfiillu akornanni angallassissutitut tamanut atuuttunut akikinnerpaanut aningaasartuutit tamarmiusut, taamaattoq timikkut tarnikkulluunniit innarluutilimmut ingiallortaanullu ataatsimut annerpaamik katillugit kr. 30.000.

*Imm. 2.* Ilinniartitaanermut Naalakkersuisoqarfiup imm. 1-imi aningaasanut killigigitap qaangerneqarnissaa immikkut akuersissutigisinnaavaa, tamanna pissutsinik immikkut ittunik tunngaveqarpat, tamatumunnga ilanngullugu najugaqarfiup sumiiffia pissutigalugu angalaneq annertuumik akisunerulersimassappat.

**§ 11.** Ilinniartup angalanerminut atatillugu pisariaqartumik unnuisariaqarnerinut tapiissutitut aningaasartuutit tamakkiisumik akilerneqassapput, tak. § 1, imm. 1, nr. 3.

*Imm. 2.* Angalaneq ilinniartup pisuussutiginnigisaanik allanngortariaqalersillugu tassanngaannartumik ineqartitsinissaq pisariaqalissappat, ineqarfissaq aningaasartuuteqarnissarlu inissiineq sioqqullugu ilinniartitaanermut naalakkersuisoqarfimmit akuerineqaaqqaassaaq.

**§ 12.** Ilinniartup angalanerminut atatillugu pisariaqartumik nerisaqarnissaanut tapiissutit, tak. § 1, imm. 1, nr. 4 tunniunneqartarput najugaqarfigisami nerinerminut allagartatut.

*Imm. 2.* Ineqarfigisaq nerinerminut allagartanik tigusineq ajorpat, nerisaqarnerminut tapiissutit tunniunneqassapput, angalareernerminu aningaasartuutigisimasanut uppersaatinik tunniussisoqarpat nerinerminullu ataatsimut kr. 100 tapiissutaassalluni.

*Imm. 3.* Angalanerup ingerlanerani ilinniartup pisuussutiginnigisaanik allannguisoqarneratigut nerinissaq pisariaqalersimappat, nerisaqarnerminut tapiissuteqartoqassaaq angalareernerminu aningaasartuutigisimasat uppersaatinik tunniussisoqareerpat, nerinerminullu ataatsimut kr. 100 tapiissutaassalluni.

### **Kapitali 3**

#### *Tapiissutisinissamut piumasaqaatit*

**§ 13.** Tapiissuteqarnissamut makkua piumasaqaataapput:

- 1) Ilinniartuq aamma ilinniartumut angajoqqaatut oqartussaataasut efterskolimiinnerup aallartinnerani Kalaallit Nunaanni najugaqavissuussapput efterskolimiinnerullu aallartinnera sioqqullugu sivikinnerpaamik ukiumi ataatsimi Kalaallit Nunaanni najugaqavissuusimassallutik. Kalaallit Nunaata avataani najugaqarnertut naatsorsuutigineqanngillat, taamaallaat ilinniarnissaq isumaginninnerluunniit pissutigalugit Kalaallillu Nunaanni oqartussat peqataaffigisaannik najugaqarnerit,
- 2) Ilinniartuq efterskoliimiinnerup aallartinnerani ukiuni arfineq-pingasuni atuarsimassaaq imaluunniit 14-inik ukioqalereersimassalluni, 18-inillu ukioqalereersimassanani,
- 3) Ilinniartuq efterskolimi Danmarkimi ilinniartitaanermut ministerimit akuerisaasumi ilinniartussat akuerineqarsimassaaq, tak. § 14. Ilinniartuq angerlarsimaffiup avataanut inissitaq, tak. § 20, efterskolimi Danmarkimi oqartussaasut meeqqanik inissitanik

ilinniartoqarsinnaasut akuerisaanni ilinnialersinnaanerminnik akuerisaasimassapput, tak. § 14.

4) Ilinniarteq efterskolimiinnermini angajoqqaatut oqartussaataasut toqqagaanik Danmarkimi ilaqutariinnut atassuteqassaaq, tak. § 15,

5) Ilinniarteq siusinnerusukkut efterskolernissaminut tapiiffigineqarsimassanngilaq, taamaattoq tak. imm. 6.

6) Atuartoq pillugu atuarfik oqaaseqaateqassaaq, tak. § 16.

7) Tapiiffigineqarnissamik qinnuteqaat piffissaq eqqorlugu tunniunneqarsimassaaq, tak. § 23.

*Imm. 2.* Ilinniartitaanermut naalakkersuisoqarfup immikkut pisoqartillugu imm. 1, nr. 1-imi najugaqarnissamik piumasaqaat sanioqqussinnaavaa, tamatumunnga ilanngullugu ilinniarteq angajoqqaavilu ukiuni arlalinni Kalaallit Nunaanni najugaqarsimappata.

*Imm. 3.* Ilinniartitaanermut naalakkersuisoqarfup immikkut pisoqartillugu ukiuni 8-ni atuarsimanissamik piumasaqaat aamma ilinniartup 18-inikl ukioqalersimannginnissaanik piumasaqaat sanioqqussinnaavai, tak. Imm. 1, nr. 2, tamatumunnga ilanngullugu ukiut 8 ataallugit atuarsimaneq atuartup klassimik alluisimaneranik peqquteqarpat, ukioqqortuallaarnerlu atuartup klassimik uteqqiisimaneranik allamilluunniit peqquteqarluni atuarnermi kinguaattoorsimaneranik peqquteqarpat.

*Imm. 4.* Ilinniartitaanermut naalakkersuisoqarfup immikkut pisoqartillugu imm. 1, nr. 5-imi siusinnerusukkut tapiiffigineqarsimannginnissamik piumasaqaat sanioqqussinnaavaa, tamatumunnga ilanngullugu ilinniarteq nammineq pisuussutiginngisaminik siusinnerusukkut efterskolernerminik unitsitsiinnarsimappat imaluunniit naalakkersuisoqarfup nalilerpagu efterskolernerup nanginnissaa ilinniartup ilinniaqqinnissamut periarfissaqalernissaanut pingaaruteqarlunnartoq.

*Imm. 5.* Ilinniartitaanermut naalakkersuisoqarfup immikkut pisoqartillugu imm. 1, nr. 7-imi piffissaq eqqorlugu qinnuteqaatip tunniunneqarsimanissaanik aalajangersagaq sanioqqussinnaavaa, tamatumunnga ilanngullugu kingusinaarnek qinnuteqartup pisuussutiginngisaaq peqquteqarpat.

*Imm. 6.* Ilinniartunut inunnut annertuumik innarluutilinnut ikiorsiisarneq pillugu malittarisassanut ilaasunut, imm. 1, nr. 5 apeqqutaatinnagu ukiut pingasut tikillugit tapiisoqarsinnaavoq.

*Imm. 7.* Ilinniartitaanermut Naalakkersuisoqarfik tapiinissamut tunngatillugu piumasaqaateqarsinnaavoq, tamatumunnga ilanngullugu ilinniartup ilisarititsilluni piareersaallunilu pikkorissarnermut peqataanissaa, tak. § 4, imaluunniit ilinniartut immikkut perorsaanikkut pisariaqartitsisut efterskolernerminnut atatillugu ikiorsiiniutinut peqataanissaat, tak. § 3.

**§ 14.** Efterskolimi akuerisaasumi ilinniartussatut akuerisaaneq uppernarsarneqassaaq tamanna pillugu efterskolip atsiukkamik allagaqarneratigut.

§ 15. Angajoqqaatut oqartussaaitaasut ilaqutariinnik atassuteqarfissanik toqqaasimanerat, tak. § 13, imm. 1, nr. 4, angajoqqaatut oqartussaaitaasut aamma ilaqutariinnik atassuteqarfigineqartussanit atsiorneqartumik nalunaaruteqarnikkut uppersarneqarsimassaaq. Ilinniartitaanermut Naalackersuisoqarfimmit tamatumunnga atugassanngorlugu nalunaaruteqarnissamut immersugassiaq atorneqassaaq.

§ 16. Atuarfiup atuortoq pillugu oqaaseqaataa, tak. § 13, imm. 1, nr. 6, imaqassaaq atuortup inuttut, inooqatigiissutsikkut ilinniakkatigullu pisinnaasamigut killiffiisa allaaserinerannik. Oqaaseqaat immersugassaaq naalackersuisoqarfimmit suliarineqartoq atorlugu suliarineqassaaq.

§ 17. Ilinniartuq efterskolip aallartinnerani takkutinngitsoorpat tapiissuteqartarneq unitsinneqassaaq.

*Imm. 2.* Ilinniartitaanermut Naalackersuisoqarfiup imm. 1 sanioqqussinnaavaa, ilinniartup efterskolip aallartinnerani takkutinngitsoornera pissutsinik immikkut ittunik akuerineqarsinnaasunik peqquteqarsimappat, tamatumunnga ilanngullugu tamanna ilaqutariinni peruluttoqarneranik angallannermiluunniit pissutsinik ilinniartup pisuussutiginngisaaq peqquteqarpat.

§ 18. Efterskolimiinneq maanaanaq taamaatinneqarpat tapiissuteqartarneq ullormit taamaatiffimmiit unitsinneqassaaq. Efterskole taamaatereernerup kingorna piffissami aalajangersimasumi efterskoliimminnerup akilernerneqarnissaanik piumasaqarpat (taamaatinnermi akiliut), tapiiffigineqarnissamik pisinnaatitaaffik piffissami tassani pigiinnarneqassaaq, taamaattorli annerpaamik sapaatip-akunnerini 4-ni.

*Imm. 2.* Angerlamut angalanermut aamma pisariaqartumik unnuiffissanut nerisaqarnermullu aningaasartuutinik akiliunneqarsinnaaneq taamaallaat atuutissaaq, ilinniartuq angerlannginnermini Kalaallit Illuutaannit efterskolimut attuumassuteqartumit aaqqiissuunneqartumik oqaloqatigineqaaqarsimappat. Oqaloqatigiinnermi qularnaarneqassaaq, ajornartorsiutinut uniinnarnermut patsisaasunut aaqqiissutaasinnaasut tamarmik misilinneqarsimanissaat, tamakkununnga ilanngullugit ilinniartunut ataasiakkaanut ikiorsiissutit, tak. § 1, imm. 1, nr. 7. Oqaloqatigiinneq ilinniartup efterskoliani pissaaq, ilinniartup efterskolernerminik unitsitsiinnarniarluni nalunaaruteqarnerata kinguninnguatigut. Oqaloqatigiinnermut peqataassapput Kalaallit Illuutaanni sulisoq, efterskolimi sulisoq, ilinniartuq ilinniartorlu 18-it inorlugit ukioqarpat angajoqqaatut oqartussaaitaasut imaluunniit ilaqutariit ilinniartumut attaveqaataasut.

§ 19. Ilinniartitaanermut Naalackersuisoqarfik tapiissutit utertinneqarnissaannik piumasaqaateqarsinnaavoq, tapiissutit siunertanut akuersissutigineqartunit allaanerusunut atorneqarsimappata.

## Kapitali 4

### *Qinnuteqarnermi periutsit*

*Ilinniartut annertuumik innarluutillit aamma ilinniartut angerlarsimaffiup avataanut inissinneqarsimasut pillugit immikkut ittut*

§ 20. Ilinniartunut inunnut annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaasunut aamma ilinniartunut meeqqanik inuusuttunillu ikiorsiisarneq pillugu malittarisassat qaqugukkulluunniit atuuttut naapertorlugit angerlarsimaffimmik avataanut inissinneqarsimasunut tapiissutit aatsaat tunniunneqarsinnaapput, efterskolernissaq ilinniartup kommunerisaani isumaginninnermi oqartussaasunit akuerineqarsimappat.

*Ilinniartut immikkut perorsaanikkut ikorfartorneqarnissamik pisariaqartitsisut pillugit immikkut ittut*

§ 21. Ilinniartut Danmarkimi efterskolernermik naammassinissaanut immikkut perorsaanikkut ikiorserneqarnissamik pisariaqartitsisut taakkulu angajoqqaatut oqartussaasui, kommunerisaminni efterskolimut qinnuteqarnissaq pillugu ilitersortissapput, ikiorsiissutinik pisariaqartitsisoqarnerata qulaajarneqarnissaa siunertaralugu.

*Ilinniartunut tamanut nalinginnaasumik atuuttut*

§ 22. Ilinniartunut § 20-mi pineqanngitsunut tunngatillugu angajoqqaatut oqartussaasut namminneerlutik efterskolimut akuerisaasumut qinnuteqassapput.

*Imm. 2.* Ilinniartup efterskolimi akuerisaasumi ilinniartunngorsinnaaneramik nalunaarut aamma ilaqutariinnit attaveqaataasartussanit uppernarsaat pigineqalerpata, Namminersorlutik Oqartussanit tapiiffigineqarnissamik qinnuteqaat Ilinniartitaanermut Naalakkersuisoqarfiup immersugassiaa atorlugu immersugaq nassiunneqassaaq.

*Imm. 3.* Qinnuteqarnermi immersugassaq elektroniskimik immersorneqassaaq toqqorneqarluni, naqinneqarluni atsiorsinnarlugulu angajoqqaatut oqartussaasunit ilinniartup kommunerisaani ilinniartitaanermut ingerlatsivimmut nassiunneqassalluni. Qinnuteqaammut ilanngussatut makku ilanngunneqassapput:

- 1) Efterskolip ilinniartup ilinniartunngorsinnaaneramik nalunaarutaa.
- 2) Ilaqutariinnit attaveqaataasartussanit uppernarsaat atsiugaq, tak. § 15.
- 3) Ilinniartoq pillugu atuarfimmitt oqaaseqaat atsiugaq, tak. § 16.
- 4) Isumaginninnermi oqartussaasunit taamatut pisinnaatitaasunit oqaaseqaat atsiugaq, ilinniartoq meeqqat inuusuttullu ikiorserneqartarnerat pillugu malittarisassat

qaqugukkulluunniit atuuttut naapertorlugit angerlarsimaffiup avataanut inissinneqarsimatillugu, imaluunniit inunnt annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaatillugu.

5) Qinnuteqartut § 8, imm. 1, 2 aamma 4-mi taaneqartut aammattaaq akileraaruteqaataasussamik isertitanut uppersaatit ilanngullugit nassiutissavaat.

*Imm. 4.* Qinnuteqarfissami aammattaaq makku ilanngunneqassapput:

- 1) angajoqqaat namminneerlutik angalaneq aaqqissuunniareraat, aamma
- 2) angalanissamut immikkut kissaateqartoqarnerseq.

*Imm. 5.* Ilinniartitaanermut ingerlatsiviup tapiiffiqineqarnissamik qinnuteqaat aamma ilanngussassat imm. 3-mi taaneqartut assilineri Ilinniartitaanermut Naalackersuisoqarfimmut nassiutissavai.

**§ 23.** Tapiiffiqineqarnissamik qinnuteqaat ilinniartitaanermut ingerlatsivimmit tiguneqareersimassaaq kingusinnerpaamik 1. februar ukiumi efterskolernerup aallartiffissaani. Misissuiartorluni angalanermut tapiiffiqineqarnissamik qinnuteqaat ilinniartitsinermut ingerlatsivimmit tiguneqareersimassaaq 1. februar ukioq efterskolimiinnerup aallartiffissaa ukiumik ataatsimik sioqqullugu.

*Imm. 2.* Tapiiffiqineqarnissamik qinnuteqaat ilinniartitaanermut naalackersuisoqarfimmit imaluunniit ingerlatsisussat naalackersuisoqarfiup pisinnaatitaanit tiguneqareersimassaaq kingusinnerpaamik 15. februar ukiumi efterskolernissap aallartiffissaani. Misissuiartorluni angalanermut tapiiffiqineqarnissamik qinnuteqaat ilinniartitaanermut naalackersuisoqarfimmit imaluunniit ingerlatsisussat naalackersuisoqarfiup pisinnaatitaanit tiguneqareersimassaaq kingusinnerpaamik 15. februar ukiup efterskoliiminnerup aallartiffissaa ukiumik ataatsimik sioqqullugu.

**§ 24.** Ilinniartitaanermut naalackersuisoqarfik qinnuteqartunut tapiiffiqineqarnissamut piumasaqaatinik piviusunngortitsisunut tapiissuteqassaaq, taamaattoq tak. imm. 2.

*Imm. 2.* Qinnuteqartut tapiissuteqarnissamut piumasaqaatinik piviusunngortitsisut aningaasaliissutigineqartunik matussuserneqarsinnaasut qaangerpatigit, ilinniartunut inunnt annertuumik innarluutilinnut ikiorsiisarneq pillugu malittarisassanut qaqugukkulluunniit atuuttunut ilaasunut imaluunniit angerlarsimaffiup avataanut inissitaasunut tapiisoqartassaaq meeqqat inuusuttullu ikiorserneqartarnerat pillugu malittarisassat qaqugukkulluunniit atuuttut naapertorlugit, tamatumalu kingorna tapiiffiqineqarsinnaasut sinnerisa akornanni makitsinikkut tapiissutit tunniunneqassapput. Makitsineq pissaaq kommuninit tamanit qinnuteqartut procentinngorlugi amerlaqatigiittussanngorlugit.

**§ 25.** Ilinniartitaanermut naalackersuisoqarfiup ukiumi efterskolernerup aallartiffissaani kingusinnerpaamik 15. marts qinnuteqartut nalunaarfigissavai tapiissutit akuerisaasimanersut.

*Imm. 2.* Ilinniartitaanermut naalackersuisoqarfiup efterskolit ilinniartoriligassaannut



tapiissutit tunniunneqartut taakkualu tunniuneqarnissaannut periutsit pillugit nalunaarfigissavai.

*Imm. 3.* Ilinniartitaanermut naalakkersuisoqarfiup ilinniartitaanermut ingerlatsivik tapiissutinik qinnuteqaatit nassiussimasai pillugit aalajangiinernik ilisimatissavaa.

*Imm. 4.* Ilinniartitaanermut naalakkersuisoqarfiup Danmarkimi kalaallit illutaat sumiiffinni attuumassuteqarfigisaanni efterskolini ilinnialersussat pillugit ilisimatissavai.

#### *Paasissutissiisussaatitaaneq*

§ 26. Angajoqqaatut oqartussaasut pisussaaffigaat ilinniartup efterskolimiinnerminik unitsitsinera, ilinniarfimmu allamut nuunnera paasissutissallu allat tapiissutisiuarnissamut pingaaruteqartut pillugit ilinniartitaanermut naalakkersuisoqarfimmu nalunaarnissaq.

*Imm. 2.* Ilinniartitaanermut naalakkersuisoqarfik pisinnaatitaavoq tapiiffigineqarnissamik qinnuteqaatip nalilernissaanut paasissutissat pisariaqartut tamaasa piniarnissaannut, tamatumunnga ilanngullugit isertitat pillugit paasissutissat.

#### *Angalanernik aaqqissuussineq*

§ 27. Ilinniartitaanermut naalakkersuisoqarfiup ilinniartullu kommuunerisaani ingerlatsiviup angajoqqaatut oqartussaasut isumasiorlugit ilinniartut efterskolimut angalanissaasa piareersarnissaat isumagissavaat, taamaattoq tak. Imm. 3 aamma § 29, imm. 1.

*Imm. 2.* Ilinniartitaanermut naalakkersuisoqarfiup ilinniartut Danmarkimut tikinnerminni isumagineqarnissaat ataqatigiissassavaa.

*Imm. 3.* Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaasut isumasiorlugit ilinniartut efterskolimut angalanissaasa piareersarnissaat Danmarkimullu tikinnerminni isumagineqarnissaat isumagissavaat.

§ 28. Kalaallit Illuutaata inissisimanermigut ilinniartup efterskolianut attuumassuteqartup angajoqqaatut oqartussaasut isumasioqatigalugit ilinniartup efterskolereernermini angerlamut angalanissaata piareersarnissaa isumagissavaat, taamaattoq tak. Imm. 2 aamma § 29, imm. 2.

*Imm. 2.* Ilinniartunut angerlarsimaffiup avataanut inissitanut tunngatillugu isumaginninnermi oqartussaasup pisinnaatitaaffeqartup angajoqqaatut oqartussaasut isumasiorlugit ilinniartut efterskolimit angerlarnissaat isumagissavaa.

§ 29. Angajoqqaatut oqartussaasut namminneerlutik ilinniartup efterskoliliarnissaanik piareersaallutillu isumaginnikkumasut, kommunimi ilitsersuisoqarfik aamma ilinniartitaanermut naalakkersuisoqarfik tamanna pillugu sioqqutsilluarlutik ilisimatissavaat, kingusinnerpaamik aallarnissaq qaammatinik tallimanik sioqqullugu.

*Imm. 2.* Angajoqqaatut oqartussaasut namminneerlutik ilinniartup efterskolimeereeruni angerlarnissaanik piareersaallutillu isumaginnikkumasut, Kalaallit Illuutaat tamanna pillugu sioqqutsilluarlutik ilisimatissavaat, kingusinnerpaamik angerlamut aallarnissaq qaammatinik tallimanik sioqqullugu.

#### *Angalanermut aningaasartuutitik utertitsineq*

**§ 30.** Angajoqqaatut oqartussaasut ilinniartup efterskolimut efterskolimiillu angalaneramik isumaginnittut, Ilinniartitaanermut naalakkersuisoqarfimmit bilitsimut akikinnerpaamut, allangortinneqarsinnaangitsumut sillimatitaqanngitsumullu aningaasartuutitik uppersaasikkat utertillugit akilertissinnaavaat. Aningaasartuutit ilinniartumut namminermut angerlarsimaffiup Københavnillu akornanni angalanermut, kiisalu Danmarkimi aqqummut akikinnerpaamut aningaasartuutit naatsorsorneqassapput.

*Imm. 2.* Bilitsi akikinnerpaaq imaluunniit allangortinneqarsinnaangitsoq atorineqanngippat, utertoortigineqarsinnaapput ullormi angalaffimmi bilitsip allangortinneqarsinnaangitsup akia angalanerulluunniit akikinnerpaap nalinga.

*Imm. 3.* Angajoqqaat Kalaallit Nunaanni mittarfeqarfimmut qaninnermut namminneerlutik angallassinigut aningaasartuutitik namminneq akilissavaat.

**§ 31.** Timmisartumut bilitsit suliarereernerisa kingorna allanguinermi aningaasartuutaanerujunnartunut aningaasartuutit angajoqqaanit akilerneqassapput, tamanna angajoqqaatut oqartussaasut angalanermut kissaatinik allanguinerannik peqquteqarpat.

#### *Tapit tunniunneqartarnerat*

**§ 32.** Efterskolimiinnermut tapit, tak. §§ 7 aamma 8, efterskolimut pineqartumut akilerneqassapput.

*Imm. 2.* Tapisianik akiliisarneq unitsinneqassaaq efterskolimiinneq unitsinneqarpat, taamaattoq tak. § 18, imm. 1.

#### *Maalaarnissamut periarfissat*

**§ 33.** Tapit pillugit aalajangiinerit ingerlatsinikkut oqartussaasumut allamut maalaarutigineqarsinnaangillat.

## Kapitali 5

### *Atuuttuulernermik, ikaarsaariarnermi atorunnaarsitsinermillu aalajangersakkat*

§ 34. Nalunaarut atuuttuulissaaq 1. januar 2014 ukiumiillu atuarfiusumit 2014-2015-imiit atuutilissalluni.

*Imm. 2.* Ilutigisaanik atorunnaarsinneqarpoq Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 14, 3. september 2009-meersoq.

*Imm. 3.* Imm. 2 apeqquataatinnagu Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 14, 3. september 2009-meersumi § 7 naapertorlugu tapiissutit tunniunneqarsimasut ukiup atuarfiusup 2015-imi naanissaanut atuutissapput.

*Namminersorlutik Oqartussat, 23/12-2013*



Nick Nielsen



Mikael Kristensen